

AMF: Progreso grandi tumando luga na Palo Marga

PALO MARGA- Durante ultimo lunanan e comision AMF (Aruba Motorsports Foundation), ta realisando progreso nan grandi na Aruba su pista di drag race, Palo Marga.

For di aña pasa miembro nan di AMF a cuminsa cu

organisa caredanan di drag na Palo Marga y eventualmente a forma un comision (AMF) pa sigui cu e responsabilidad nan aki den 2016.

Apesar di a cuminsa e aña cu algun evento di street legal y drifting, cual a bay sumamente positivo, mester bisa cu e 'do-

lor di cabes' mas grandi tabata e timing system di Palo Marga. Esaki ta e sistema cu ta record e tempo y velocidad cu e auto nan di careda ta marca durante careda. E timing system tabata riba su ultimo rosea nan y e grupo di AMF a eligi di pone un pauze na caredanan na Palo Marga pa asina elimina e timing system bieu y busca moda di yega na un sistema nobo.

Den fin di siman cu a pasa e meta aki a wordo realisa. Despues di hopi lucha pa crea fondo organisando eventonan di drift y grudge race, hunto cu fondo nan crea durante evenemento nan di careda di fin di 2015 a logra di yega na e fondo nan necesario pa inverti den un timing system completamente nobo pa Palo Marga.

Durante ultimo siman nan, tur e material y ekipo nan di e timing system nobo a yega Aruba



y siman pasa Bob Brockmeyer di Compulink a bialha pa Aruba pa bin haci e instalacion final.

Antes di por a realisa e meta aki, e grupo di AMF a haci tur e trabao nan di preparacion na Palo Marga, cual tabata consisti di varios siman largo di coba vloer pa pasa tubería di PVC nobo pa cual tur waya di sensor lo core aden. Unabes cu AMF a haci e parti preparatorio, e momento a yega pa Bob Brockmeyer di Compulink bin Aruba y completa e parti di su experticio. Esaki a tuma alrededor di un siman pa completa.

E timing system aki di COM-PULINK ta un di e sistemanan di mas renombra den e mundo di drag racing. Cu e sistema aki instala na Palo Marga ta pone Aruba su pista di drag mas cerca atrobe na un nivel di profesionalismo cu e grupo di AMF tin como meta pa Palo Marga.

Sinembargo, esaki no ta e unico mehoracion cu Palo Marga ta mirando. Ya caba durante ultimo luna nan Palo Marga ta ricibiendo mantencion y tambe varios otro tipo di mehoracion.

- Pafo di e porta di Palo Marga por mira cu e caminda nan di entrada y salida a wordo mas miho distingui y tambe cu rosamento di hubada cual a crece riba caminda y na muraya nan.
- Despues di e rosa parti di hubada nan cu e tapa e muraya completo a logra di pinta e nomber di Palo Marga completamente di nobo.
- Paden di Palo Marga tambe a tuma luga y limpieza masha grandi cu e gran asis-

tencia di Serlimar.

- E cuminsa lanta muraya nan cu split blocks colorido unda antes tabata tin hekinan cu a frustia y cuminsa cay.
- A baha e scoreboard nan cu tambe tabata den un situacion critico pa via di e biento di salpeter. Esaki nan a wordo drecha y waya nobo instala cu luz nobo y a wordo lanta bek.

Proximamente lo sigui cu mas mehoracion y mantencion di e facilidad. Siguiendo trabao nan lo consisti di cuminsa planta mata den e tereno di Palo Marga y tambe verf muraya nan y kolomnan cu ta den necesidad di esaki.

Lo cuminsa prepara e muraya nan unda ta conoci cu e logo nan di compania nan cu ta asisti Palo Marga y tambe sponsor of trabao nan por wordo bon promovi y propaganda.

E palo di luznan tambe lo cuminsa haya e atencion necesario pa asina por sigura cu esaki nan por keda den funcion pa varios aña mas.

Tur esaki cual a tuma luga y lo mester tuma luga ainda ta biniendo di e gran esfuerso di e grupo di AMF y boluntarionan cu ta bin yuda. Un danki ta bay na e persona nan aki y tambe na e compania nan cu asisti pa asina haci e trabao nan aki mas facil.

Awor cu Palo Marga tin su timing system nobo, lo bay over na organisa un weekend di testing na unda tur participante por bin test y registra nan mes den e sistema nobo.

E detaye di e evento aki lo wordo anuncia pronto.

